



12. august 2011

UKA 2011/88

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Umiarsuit usinik assartuutit Aasiaat Uummannallu akornanni kiisalu Aasiaat Upernaviullu akornanni angalasut, inunnik 12-it tikillugit ilaasoqartalernissaannik Inatsisartut 2012-mi upernaakkut ataatsimiinnginnerini Naalackersuisut Royal Arctic Line-mik isumaqatigiissusiornissaanik sulissuteqaqqullugit inatsisartut aalajagiiffigisassaattut siunnersuut.

(Inatsisartuni ilaasortaq Knud Kristiansen aamma Siverth K. Heilmann, Atassut)

Tunngavilersuut:

Ilaasartaatip Sarfaq Ittuk-p Uummannamut Upernavimmullu angalasarunnaarnerata kingunerisaanik avannaani najungaartut ilaasa ilaquttaminnut kamaalaatiminnullu nunanatta sinnerani najungaartunut tikeraarnissaminnut periarfissaarussimasut Atassut-mit ilisimaaraarput. Qaammatini inuit sulinngiffeqarfiisa nalaanni timmisartukkut angalaniarneq ajornarsisarpoq, amerlasuutigummi siumoortumik timmisartumik angalanissamut billet-it nungoreersimasarmata.

Taamaattumik Atassut-mit isumaqarpugut angalaniartut umiarsuarnut pajuttunut juni-miit decembarip tungaanut sapaaatip akunnera allortarlugu Upernavimmut Uummannamullu angalasartunut ilaanissaminnut periarfissinneqarnissaat iluatinnartuusoq. Royal Arctic Line-mit paasitineqarpugut maannakkuugallartoq pajuttaatit atorpeqartut ilaasunik angallassisutitut atorpeqarsinnaanngitsut, uniarsuilli nutaat 2011-ip ingerlanerani atorpeqalertussat ilaasunik angallassisinnaanissanut periarfissaqartut.

Umiarsuit pajuttaatit angallannermik nakkutilliisoqarfiup maleruaqqusai malillugit ilaasut 12-it tikillugit ilaasoqarsinnaapput, umiarsuit sillimaniarnikkut piumasqaataasut naammassippatigit. Umiarsuaq 12-it sinnerlugit ilaasoqarsinnaasoq ilaasartaatitut maleruaqqusat malillugit naatsorsuunneqalertarpoq, tassungalu piumasqaatit aamma allaapput. Tamaattumik Naalackersuisut Royal Arctic Line-llu akornanni isumaqatigiissutissaanni aallaavigineqassapput ilaasut 12-it.

Umiarsuit pajuttaatit siullerpaatut suliassaraat illoqarfiit nunaqarfiillu nioqqutissanik pilersornissaat, taakkualu ilaasunik angallassisinnaalernissaat taamallaat saniatigit kiffartuussinertut isigineqassasoq Atassut-miit kissaatigaarput. Naalackersuit Royal Arctic Line-llu akinut isumaqatigiinniarnissaannut Atassut-mit kissaatigaarputtaaq anguniarneqassasoq Air Greenland-ip silaannakkut maanna angallavigisaani equngasumik unammilertoqalersinnaanera pakkersimaarneqassasoq, tassami pajuttaatinut ilaasunik angallassisoqartalernissaa Upernavimmi, Uummannami nunaqarfiinilu najungaartunut angallannikkut periarfissaannut pitsanngorsaatissaattut isigineqassammat.

Pisortanut aningaasatigut allaffissornikkullu kingunerisassai:

Pisortanut aningaasatigut allaffissornikkullu kinguneqassasoq naatsorsuutigineqassaaq. Aningaasatigut allaffissornikkullu kingunerisassai tassaassapput piffinni qulaani taaneqartuni angallassinissamut isumaqatigiissutissap Royal Arctic Line-mut inissinniarnerani, kiisalu aalajangernissap Air Greenland-imut GLV-mullu kingunerisinnaasaata misissornissaannut.

Aamma naatsorsuutigineqarsinnaavoq Royal Arctic Line-p angallassinissamut isumaqatigiissutissamik "service kontrakt"-imik kissaateqarsinnaanera qulaani angallavissanut taaneqartunut.

Inuussutissarsiornermut aningaasaqarnikkut allaffissornikkullu kingunerisassai.

Royal Arctic Line ilaasunik angallassisalernissap aallartisanissanut ingerlannissaanullu atasunik aningaasartuuteqassaaq. Royal Arctic Line-ip umiarsuassaasa pajuttaatit, ilaasunik angallassisinnaanermut piumasaqaataasut naammassereerpai. Taamaattumik Royal Arctic Line-p aningaasartuutissai tassaajumaarput ilaaniarlutit billet-inik inniminniisut pisiniartullu sullinnissai taakkualu angalasut umiarsuaq qimappassuk umiarsuup eqqartarnissaa. Royal Arctic Line-lli ilaasussat akiliutaanik aningaasartuutit matussusersinnaanissaanut periarfissaqarpoq.

Toqqaannangikkaluamik namminersortornut allanut Upernaviup Uummannallu akornani angallassisartunut aningaasaqarniarnerannut kinguneqarsinnaavoq, tamassumali annikitsuunissaa naatsorsuutigineqarpoq ilisimasimannittoqanngimmat taamatut angallassisartunik.

Innuttaasunut aningaasaqarnikkut allaffissornikkullu kingunerisassai.

Angalasussanut aningaasartuunissaa kisimi naatsorsuutigineqarpoq.